



KOPI PAHIT

Ketua Jabatan Agama Negeri Sembilan telah menulis

kepada wakil-wakil penjual buku mengatakan bahawa kitab

Ibadat Rasulullah diharamkan untuk dijual

di Negeri Sembilan kerana berlawanan dengan pengajaran Imām

Shāfi‘ī yang menjadi pegangan di negeri itu. Orang

tentu bertanya: Apakah pendapat pengajaran Imām Shāfi‘ī sahaja yang

Islam sedang pendapat imam yang lain tidak Islam -

kerana itu diharamkan? Apakah orang-orang yang tidak

bermazhab sebelum zaman mazhab bukan Islam.

Māshā’ Allāh! Beginilah sampainya?

* * *

Tidak lama dahulu orang PAS di suatu tempat

mengadakan sandiwara. Dengan megah mereka mengatakan bahawa

sandiwara mereka semua lelaki - tidak ada wanita.

Benar dalam gambarnya banyak lelaki pakai pakaian wanita!

Tetapi apakah hukum Tuhan kepada lelaki yang memakai

pakaian wanita yang menyerupai wanita? Ustaz Burhuddin

dan Ustaz Uthman Abdullah harap perhati dan beri

ingat pada anak-anaknya supaya jangan main burung - Bung!

* * *

Orang bertanya: kenapa hari-hari perompak, samun, gaduh di antara geng dengan geng selalu berlaku? Jawabnya, ialah kerana wang. Geng-geng dahulu bergaduh adalah kerana mempertahankan maruah mereka tetapi sekarang kerana berebut

bahagian wang yang diperas dari orang ramai. Tidak ada kerja senang, tak payah kerja lain daripada ambil hak orang. Ini haram bukan? Tentu! Tetapi bagaimana mahu dapat yang halal kalau lapangan kerja tertutup! Sebabnya: peraturan buruh yang ketat, Bung!

* * *

Ada orang bertanya: bagaimana haji Tunku kelak kerana ia pergi haji adalah kerana menuaikan nazar. Nazar tidak nazar jangan disebut - ia pergi ke tempat yang mulia, ke Bait Allāh al-Harām - patut disyukuri dan jangan dipersoalkan. Yang diharap semoga sepulangannya Tunku mendapat pertunjuk apa ertinya berjuang dan yang diperjuangkan kerana Islam.

* * *

Kiyai Fadhlullah Suhaimi di dalam makalahnya membidas pendapat al-Ustadh Abu Bakar al-Ashaari mengatakan bahawa: Adakah maruah manusia membenarkan memakan kura-kura, lelabi, ular dan seumpamanya? Orang-orang ahl al-sunnah menjawab apakah hukum Islam itu digantungkan berpandu kepada maruah atau daripada hukum Tuhan untuk menghalalkan atau mengharamkan sesuatu? Nah! Bertemu kata dengan kata, bertemu buku dengan ruas, Bung!

* * *

Ada orang bertanya: Mengapa perusahaan-perusahaan orang-orang Melayu (Islam) selalu tidak berapa maju dan selalu lekas malap? Jawabnya, kerana ia suka meniru! Kalau ada orang buat begini ia cuba ikut pula buat begitu dengan tidak mau berusaha mengeluarkan pendapat sendiri. Siapa pula yang suka meniru dan banyak meniru? Mahu tahu tanya sama:

- Cemeti al-Farouk.